



BOLETÍN DEL CLERO  
DEL  
**OBISPADO DE LEÓN**

SANCTISSIMI DOMINI NOSTRI  
LEONIS DIVINA PROVIDENTIA PAPAE XIII  
EPISTOLA ENCYCLICA

AD PATRIARCHAS PRIMATES ARCHIEPISCOPOS EPISCOPOS  
ALIOSQUE LOCORVM ORDINARIOS PACEM ET COMMUNIONEM  
CVM APOSTOLICA SEDE HABENTES

DE ROSARIO MARIALI

VENERABILIBVS FRATRIBVS  
PARIARCHIS PRIMATIBVS ARCHIEPISCOPIS EPISCOPIS ALIISQUE  
LOCORVM ORDINARIIS PACEM ET COMMUNIONEM  
CVM APOSTOLICA SEDE HABENTIBVS

**LEO PP. XIII**

**Venerabiles fratres: salutem et apostolicam benedictionem.**

Augustissimae Virginis Mariae foveri assidue cultum et contentiore quotidie studio promovori quantum privatim publiceque intersit, facile quisque perspiciet, qui secum reputaverit, quam excelsa dignitatis et gloriae fastigio Deus ipsam collocarit. Eam enim ab aeterno ordinavit ut Mater Verbi fieret humanam

carnem assumpturi; ideoque inter omnia, quae essent in triplici ordine naturae, gratiae gloriaeque pulcherrima, ita distinxit, ut merito eidem Ecclesia verba illa tribuerit: *Ego ex ore Altissimi prodigi primogenita ante omnem creaturam* (1). Ubi autem volvi primum coepere saecula, lapsis in culpam humani generis aucto-ribus infectisque eadem labe posteris universis, quasi pignus constituta est instaurandae pacis atque salutis.—Nec dubiis honoris significationibus Unigenitus Dei Filius sanctissimam matrem est prosequutus. Nam et dum privatam in terris vitam egit, ipsam adscivit utriusque prodigi administram, quae tunc primum patravit; alterum gratiae, quo ad Mariae salutationem exultavit infans in utero Elisabeth; alterum naturae, quo aquam in vinum convertit ad Canae nuptias: et quum supremo vitae suae publicae tempore novum conderet Testamentum divino sanguine obsignandum, eamdem dilecto Apostolo commisit verbis illis dulcissimis: *Ecce mater tua* (2). Nos igitur qui, licet indigi- ni vices ac personam gerimus in terris Iesu Christi Filii Dei, tantae Matris persequi laudes numquam desistemus, dum hac lucis usura fruemur. Quam quia sentimus haud futuram Nobis, ingravescente aetate, diuturnam, facere non possumus quin omnibus et singulis in Christo filiis Nostris Ipsius cruce penden- tis extrema verba, quasi testamento relictam, iteremus: *Ecce mater tua*. Ac praecclare quidem Nobiscum actum esse censebimus, si id Nostrae commendationes effecerint, ut unusquisque fidelis Mariali cultu nihil habeat antiquius, nihil carius, liceatque de singulis usurpare verba Ioannis, quae de se scripsit: "Accepit eam discipulus in sua" (3) Adventante igitur mense Octobri, ne hoc quidem anno patimur, Venerabiles Fratres, carere vos Litteris Nostris, rursus adhortantes sollicitudine qua possumus maxima, ut Rosarii recitatione studeat sibi quisque ac laboranti Ecclesiae demereri. Quod quidem precandi genus divina provi- dentia videtur sub buius saeculi exitum mire invaluisse, ut languescens fidelium excitaretur pietas; idque maxime testan- tur insignia templo ac sacraria Deiparae culto celeberrima. —Huic

(1) Eccl. XXIV, 5.

(2) Io. XIX, 27.

(3) Ib.

divinae Matri, cui flores dedimus mense Maio, velimus omnes fructiferum quoque Octobrem singulari pietatis affectu esse dicatum. Decet enim utrumque hoc anni tempus ei consecrari, quae de se dixit: *Flores mei fructus honoris et honestatis* (1).

Vitae societas atque coniunctio, ad quam homines natura feruntur, nulla aetate fortasse arctior effecta est, aut tanto studio tamque communi expetita, quam nostra. Nec quisquam sane id reprehendat, nisi vis naturae nobilissima ad prava saepe consilia detorqueretur, convenientibus in unum atque in varii generis societas coeuntibus impiis hominibus *adversus Dominum et adversus Christum eius* (2). Cernere tamen est, idque profecto accidit iucundissimum, inter catholicos etiam adamari magis coepitos pios coetus; eos haberi confertissimos; iis quasi communibus domiciliis christiana vinculo dilectionis ita adstringi cunctos et quasi coalescere, ut vere fratres et dici posse et esse videantur. Neque enim, Christi caritate sublata, fraterna societate et nomine gloriari quisquam potest; quod acriter olim Tertullianus hisce verbis persequebatur: *Fratres vestri sumus iure naturae matris unius, etsi vos parum homines, quia multi fratres. At quanto dignius fratres et dicuntur et habentur qui unum patrem Deum agnoscunt, qui unum spiritum biberunt sanctitatis, qui de uno utero ignorantiae eiusdem ad unam lucem expaverint veritatis?* (3). Multiplex autem ratio est, qua catholici homines societas huiusmodi saluberimas inire solent. Huc enim et circuli, ut aiunt, et rustica aeraria pertinent, itemque conventus animis per dies festos relaxandis, et secessus pueritiae advigilanda, et sodalitia, et coetus alii optimis consiliis instituti complures. Profecto haec omnia, etsi nomine, forma, aut suo quaeque peculiari ac proximo fine, recens inventa esse videantur, re tamen ipsa sunt antiquissima. Constat enim, in ipsis christiana religionis exordiis eius generis societatum vestigia reperiri. Serius autem legibus confirmatae, suis distinctae signis, privilegiis donatae, divinum ad cultum in templis adhibitae, aut animis corporibusve sublevantis destinatae, variis

(1) Eccli. XXIV, 23.

(2) Ps. II, 2.

(3) Apolog. c. XXXIX.

nominibus, pro varia temporum ratione, appellatae sunt. Quorum numerus in dies ita percrebuit, ut, in Italia maxime, nulla civitas, oppidum nullum, nulla ferme paroecia sit, ubi non illae aut complures, aut aliquae certe habeantur.

In his minime dubitamus praeclarum dignitatis locum assignare sodalitati, quae a sanctissimo Rosario nuncupatur. Nam sive eius spectetur origo, e primis pollet antiquitate, quod eiusmodi institutionis auctor fuisse feratur ipse Dominicus pater: sive privilegia aestimentur, quamplurimis ipsa ornata est, Decessorum Nostrorum munificentia.—Eius institutionis forma et quasi anima est *Mariale Rosarium*, cuius de virtute fusc alias loquuti sumus. Verumtamen ipsius Rosarii vis atque efficacitas, prout est officium Sodalitati, quae ab ipso nomen mutuatur, adiunctum longe etiam maior apparet. Neminem enim latet, quae sit omnibus orandi necessitas, non quod immutari possint divina decreta sed, ex Gregorii sententia, *ut homines postulando mereantur accipere quod eis Deus omnipotens ante saecula disposuit donare* (1). Ex Augustino autem: *qui recte novit orare, recte novit vivere* (2). At preces tunc maxime robur assumunt ad coelestem opem impetrandam, quum et publice et constanter et concorditer funduntur a multis, ita ut velut unus efficiatur precantium chorus: quod quidem illa aperte declarant Actuum Apostolicorum, ubi Christi discipuli, expectantes proemissum Spiritum Sanctum, fuisse dicuntur *perseverantes unanimiter in oratione* (3). Hunc orandi modum qui sectentur, certissimo fructu carere poterunt nunquam. Iam id plane accidit inter sodales a sacro Rosario. Nam, sicut a sacerdotibus divini Officii recitatione, publici iugiterque supplicatur, ideoque validissime; ita publica quodammodo, iugis, communis est supplicatio sodalium, quae fit recitatione Rosarii, vel *Psalterii Virginis*, ut a nonnullis etiam Romanis Pontificibus appellatum est.

Quod autem, uti diximus, preces publice adhibitae multo iis praestent, quae privatim fundantur, vimque habeant impenetrandi maiorem, factum est ut Sodalitati a Sacro Rosario nomen

(1) Dialog. 1. 1, c. 8.

(2) In Ps. CXVIII.

(3) Act. 1, 14.

ab Ecclesiae scriptoribus inditum fuerit «militiae precantis, a Dominico Patre sub divinae Matris vexillo conscriptae», quam scilicet divinam Matrem sacrae litterae et Ecclesiae fasti salutant daemonis errorunque omnium debellatricem. Enimvero Mariale Rosarium omnes, qui eius religionis petant societatem, communī vinculo adstringit tamquam fraterni aut militaris contubernii, unde validissima quaedam acies conflatur ad hostium impetus repellendos, sive intrinsecus illis sive extrinsecus urgeamur, rite extracta atque ordinata Quamobrem merito pii huius instituti sodales usurpare sibe posunt verba illa S. Cypriani: *Publica est nobis et communis oratio, et quando oramus, non pro uno, sed pro toto populo oramus, quia totus populus unum sumus* (1). Ceterum eiusmodi precationis vim atque efficaciam anuales Ecclesiae testantur, quum memorant et fractas navali proelio ad Echinadas insulas Turcarum copias, relatas de iisdem superiore saeculo ad Temesvariam in Pannonia et ad Corcyram insulam victorias nobilissimas. Prioris rei gestae memoriam perennem exstare voluit Gregorius XIII, die festo instituto Mariae Victricis honori; quem diem postea Clemens XI Decessor Noster titulo Rossarii consecravit, et quotannis celebrandum in universa Ecclesia decrevit.

Ex eo autem quod precans haec militia sit «sub divinae Matris vexillo conscripta», nova eidem virtus novus honor accedit. Huc maxime aspectat repetita crebro, in Rosarii ritu, post orationem dominicam angelica salutatio. Tantum vero abest ut hoc dignitati Numinis quodammodo aduersetur, quasi suadere videatur maiorem nobis in Mariae patrocinio fiduciam esse collaudam quam in divina potentia, ut potius nihil Ipsum facilius permovereat propitiumque nobis efficiat. Catholica enim fide docemur, non ipsum modo Deum esse precibus exorandum, sed beatos quoque coelites (2), licet ratione dissimili, quod a Deo, tamquam a bonorum omnium fonte, ab his, tamquam ab intercessoribus, petendum sit *Oratio* inquit S. Thomas, *porrigitur alicui dupliciter, uno modo quasi per ipsum implenda, alio modo, sicut per ipsum impetranda. Primo quidem modo soli Deo*

(1) De orat. domin.

(2) Conc. Trid. sess. XXV.

orationem porrigimus. quia omnes orationes nostrae ordinari debent ad gratiam et ad gloriam consequendam, quae solus Deus dat, secundum illud Psalmi LXXXIII, 12: «gratiam et gloriam dubit Dominus». Sed secundo modo orationem porrigimus sanctis Angelis et hominibus, non ut per eos Deus nostras petitiones cognoscat, sed ut eorum precibus et meritis orationes nostrae sorulantur effectum. Et ideo dicitur Apoc. VIII, 4, quod ascendit fumus incensorum de orationibus sanctorum de manu Angeli coram Deo (1). Iam quis omnium, quotquot beatorum incolunt sedes, audeat cum augusta Dei Matre in certamen de inerendae gratiae venire? Ecquis in Verbo aeterno clarius intuetur, quibus angustiis premamur quibus rebus indigeamus? Cui maius arbitrium permissum est permovere Numinis? Quis maternae pietatis sensibus aequari cum ipsa queat? Id scilicet causae est cur beatos quidem coelites non eadem ratione precemur ac Deum, nam a sancta Trinitate petimus ut nostri misereatur, ab aliis autem sanctis quibuscumque petimus ut orent pro nobis (2); implorandae vero Virginis ritus aliquid habeat cum Dei cultu commune, adeo ut Ecclesia his vocibus ipsam compellat, quibus exoratur Deus; Peccatorum miserere. Rem igitur optimam praestant sodales a sacro Rosario, tot salutationes et Mariales preces quasi certa rosarum contexentes. Tanta enim Mariae est magnitudo, tanta, qua apud Deum pollet, gratia, ut qui opis egens non ad illam configiat, is optet nullo alarum remigio volare.

Alia etiam Sodolitatis, de qua loquimur, laus est, nec prætereunda silentio. Quoties enim Marialis recitatione Rosarii salutis nostrae mysteria commentamur, toties officia sanctissima, caelesti quondam Angelorum militiae commissa, similitudine quadam aemulamur. Ea ipsi, suo quaeque tempore mysteria revelarunt, eorum fuere pars magna, iisdem adfuere seduli, vultu modo ad gaudium composito, modo ad dolorem, modo ad triumphalis gloriae exultationem. Gabriel ad Virginem mittitur nuntiatum Verbi aeterni Incarnationem. Bethlemico in antro, Salvatoris in lucem editi gloriam Angeli cantibus prosequuntur. Angelus Iosepho auctor est fugae arripiendae, seque in Aegiptum reci-

---

(1) S. th. 2<sup>a</sup> 2<sup>e</sup>, q. LXXXIII, a. IV.

(2) Ib.

piendi cum puerō. Iesum in horto p̄ae moerore sanguine exsudantem Angelus pio allioquo solatur. Eundem, devicta morte, sepulchro Angeli referunt atque inde reversurum praedicant angelicis comitatum catervis, quibus electorum animas admisceat sequunque rapiat ad aethereos choros, super quos *exaltata et sancta Dei Genitrix*. Piissima igitur Rosarii prece inter sodales utentibus ea maxime convenire possunt, quibus Paulus Apostolus novos Christi asseclas alloquebatur: *Accessistis ad Sion montem, et civitatem Dei viventis, Ierusalem coelestem, et multorum millium Angelorum frequentiam* (1). Quid autem diuinus quidve suavius, quam contemplari cum Angelis cum iisque precari? Quanta niti spe liceat atque fiducia, fruituros olim in coelo beatissima Angelorum societate eos qui in terris eorum ministerio sese quodammodo addiderunt?

His de causis Romani Pontifices eximiis usque praeconiis Marianam huiusmodi Sodalitatem extulerunt, in quibus eam Innocentius VIII *devotissimam confraternitatem* (2) apellat; Pius V afirmat eiundem virtute haec consequata: *Cooperunt Christi fideles in alios viros repente mutari, haeresum tenebrae remitti et lux catholicae fidei aperiri* (3); Sixtus V, attendens quam fucrit haec institutio religioni frugifera, eiusdem se studiosissimum profitetur; alii denique multi, aut praecipuis eam indulgentiis, iisque uberrimis auxere, aut in peculiarem sui tutelam, dato nomine variisque editis benevolentiae testimoniis receperunt. Eiusmodi Decessorum nostrorum exemplis permoti, Nos etiam, Venerabiles Fratres, vehementer hortamur vos atque obsecramus, quod saepe iam fecimus, ut sacrae huius militiae singularem curam adhibeatis, atque ita quidem, ut, vobis adnientibus, novae in dies evocentur undique copiae atque scriban-

(1) Heb. XII, 22.

(2) *Splendor paternae gloriae*, die 26 Februarii 1491.

(3) *Consueverunt RR. PP die 17 Septembris 1569.*

tur. Vestra opera et eorum, qui ex clero subdito vobis curam gerunt animarum, noscant ceteri ex populo, atque ex veritate aestiment, quantum in ea Sodalitate virtutis sit, quantum utilitatis ad aeternam hominum salutem. Hoc autem contentionem poscimus eo maiore, quod proximo hoc tempore iterum viguit pulcherrima in sanctissimam Matrem pietatis manifestatio per Rosarium, quod *perpetuum* appellant. Huic nos instituto libenti animo benediximus; eius ut incrementis sedulo vos naviterque studeatis, magnopere optamus. Spem enim optimam concipimus, laudes precesque fore validissimas, quae, ex ingenti multitudinis ore ac pectore expressae, nunquam continebant; et per varias terrarum orbis regiones dies noctesque alternando, conspirantium vocum concentum cum rerum divinarum meditatione coniungant. Quam quidem laudationum supplicationumque perennitatem, multis ab炳 saeculis, divinae illae significarunt voces, quibus Oziae cantu compellabatur Iudith: *Benedicta es tu filia a Domino Deo excelso praे omnibus mulieribus super terram.... quia hodie nomem tuum ita magnificavit, ut non recedat laus tua de ore hominum.* Isque vocibus universus populus Israel acclamabat: *Fiat, fiat.* (1).

Interea, coelestium beneficiorum auspicem, paternaeque Nostrae benevolentiae testem, vobis, Venerabiles Fratres, et clero populoque universo, vestrae fidei vigilantiaeque commisso, Apostolicam benedictionem peramanter in Domino impetrinus.

Datum Romae apud S. Petrum die XII Septembris MDCCCXCVII,  
Pontificatus Nostri anno vicesimo.

LEO PP. XIII.

---

(1) Iud. XIII, 23 et seqq.